

Te mahere ā-rohe o Rodney 2020

He aronga poto i tā mātou mahere



Mihi

Tēnā, ngā mihi te tukuna atu nei ki a koutou
e nga manawhenua
e kapekape tonu nei
i ngā ahikā roa e horapa mai nā
ki te taha whakararo o te tipua tāone nei
o Tāmaki Makaurau.
Kia pāorooro tēnei karere
mā runga i ō maunga whakahī.
Kia tīmata ake au i te Kumeū,
ka rere whakawaho ki te one tapu o Muriwai.
Kia hoki ake ki uta, ko Tauwhare ki te rāwhiti,
a Tarawera ki te raki,
ki te taha whakaroto
ko Tuhirangi rāua ko Te Atuanui
Kia kauhoe ngā mihi mā te moana
ki te Araparera
ko koe tēnā e Taranaki,
ka kapi ngā pou tauawhi i a te Kaipara
i hua ai te kōrero,
*“E tupu i wīwī, i wāwā, tūria i te wera,
piri ki te rito o te rengarenga,
waiho me whakapakari ki te hua o te kawariki.”*
Ināianeī me māwhiti aku kupu ki Kaiwaka,
ki Pukekaroro ki te raraunga o te tini i mate,
te aroha tonutia i muri nei.
Kia tahuri iho rā ia ki Matakana,
ko Tamahunga tērā e tū mai rā i te pae.
Ka hīkoi aku mihi mā ngā kāhiwi
kia heke iho ki te awa o Pūhoi
kia rere aku mihi ki te tuawhenua
i nohoa e te iti me te rahi.
Kia ū mai anō taku haere ki Huapai,
ā-tangata, ā-whenua.
Nō rātou te whiwhi, nō mātou te whiwhi,
kia kī ake ai tātou katoa,
*“He rohenga tangata,
he iwi tōpuni,
mōwai tonu te whenua e takoto nei e.”*

Kei tēnei puka te whakarāpopotohanga o te Mahere Poari ā-Rohe. Toro atu
ki te paetukutuku o Te Kaunihera o Tāmaki Makaurau,
www.aucklandcouncil.govt.nz mō te roanga ake o te mahere.

He kōrero nō te Heamana

Mā tēnei mahere e ārahi ngā mahi a te poari ā-rohe mō ngā toru tau kei mua i te aroaro. Ka ārahi i ngā whakataunga mō te whakapau pūtea, ngā whanaungatanga hei whakamārō, ngā kaupapa whakahirahira ki a koe hei whakarewa ake mā te poari, ā, ka whakatōpū hoki i ngā pūkenga me ngā mōhiotanga hei kōkiri i te ara whakamua mō te hapori.

Me uaua ka kitea ngā āhuatanga taiao māhorahora o Rodney. Inā whakataurititia ana ki ērā atu poari ā-rohe, he iti te taupori, heoi, kei Rodney ngā whenua tino whānui rawa atu o tēnei rohe - neke atu i te 46 ōrau o ngā whenua o Tāmaki-Makaurau whānui. Heoi, kei te tere piki te taupori; neke atu i te 21 ōrau te pikinga mai i te tau 2013 ki te tau 2018 - koia te pikinga tuarua tino tere o ngā poari ā-rohe o Tāmaki-Makaurau. Ka titiro whakamua, e matapaehia te taupori tangata kia piki ake ki te 108,273 i mua i te tau 2036. He wero whakarewa, he wero whakatūpato hoki.

- Me pēhea te rohe nei e whakawhanake ake - ināianeī, āpōpō hoki - kia taea ai te hanga i ngā mea mō te hapori pēnei i ngā whare hōro, ngā pāka, ngā papa tākaro, ngā ara hīkoi, ngā aratau hāereere.
- E pēhea tātou e hanga i ngā mea tika kia kore ai e raru i te pikinga taupori?
- E pēhea tātou e manaaki, e tiaki i te taiao, ngā tauranga hī ika me ngā tauranga whakaterere waka, ngā awa taketake, i te taupori e piki ana?
- E pēhea tātou e whakatauritea i ngā whakapaunga pūtea ki Rodney kia kore ai e nui rawa te utu, kia whai rautaki whakapau pūtea, kia whai take ai te whakapaunga, kia whai hua ā-ratonga, ā-whare rānei i te whakapaunga?

Ko tā te mahere poari ā-rohe he kimi i te huarahi kia whakatinanahia e tātou hei hapori, kia eke panuku. Me tika te whakataurite i te utu ki tētahi taha me te whakaea wawata ki tērā atu taha.

Ka aro tonu mātou ki ngā rori marutau me te whakapaipai i ngā mea hāereere, ko te papatau i ngā rori tētahi kaupapa nui, te tū hei māngai ki te akiaki i ngā whakapaipaitanga ki ngā rori ā-motu 1 me te 16, me te whakapaipai i ngā pūnaha pahi i Rodney.

Kei te mārō tonu te wawata ki te manaaki i te taiao, ā, ka aro pū ki te whakaruruhau me te whakarauora i te pūnaha hauropi, ki te whakapiki i te ora o te wai māori e rere ana ki ngā manga, ngā awa me ngā tauranga.

Ka akiaki mātou i ngā pūtea ki te whakatū whare me ētahi atu mea hei tautoko i e whakarahinga tangata o Rodney, ā, ka ngana hoki ki te mau ki te tuakiri motuhake, te hīkaka o ngā hapori me te whakahīhī ki te rohe o Rodney.

Ko tētahi momo whare e hiahiatia ana ko te whare mō te poari ā-rohe i tēnei rohe. Ko tātou anake te poari ā-rohe karekau he whare i roto i tōnā ake rohe pōtae. I te tau 2018, e ai ki te arotake Local Government Commission, ka kitea te poari ā-rohe o Rodney mēnā ka whai whare ka tahi, ka ngāwari ake mō ngā tāngata o tēnei rohe te tae ā-tinana atu ka rua. Me tere te whakatinanatanga o tēnei wawata.

Te whakakaha i ngā hapori kia rongō ai te tangata i te ringa tautoko me te manaakitanga - he mea nui hoki tēnei. Kei te rongō mātou i tō hiahia kia hangaia ngā whare hākinakina me ngā whare ngahau hei akiaki i te tangata ki te whai i te ara ki te tinana ora ka tahi, hei painga mō ngā tāngata katoa, ahakoa te pakeke me te pūkenga ka rua.

Kua tino whakamātauria te kaha o te hapori i te urutā MATE-KORONA. I tau ohorere mai ai te raru nui, te raru whānui ki ngā whānau me ngā pakihī. Kāore e kore me urutau te rārangi mahi a te poari ā-rohe kia whai wāhi ki te rāweke ia tau, kia tika hoki tōna pīkau i ngā wawata o te hapori. Nā ngā taumahatanga o te urutā nei me āta whakarārangi tātou i ngā mahi hei kawē - he tino whakahirahira tēnei whakarārangi mēnā he kaupapa e pau ai te pūtea ki te whakatinana.

I ngā tau kua taha, i matua mārama ki a mātou ngā kaupapa e whakahirahira ana ki a koutou. He whakahirahira ngā kōrero me ngā whakaaro e whakahokia mai ai e koutou kia mārama pū ai mātou ki ngā kaupapa nunui ki te hapori - he kaupapa e hurihuri ana.

Waihoki, me rere ngātahi ngā wawata o te poari me ngā hapori o Rodney. I a mātou e waihanga ana i tēnei mahere, i whai whakaaro atu ki te Auckland Plan, te mahere e ārahi ana i te rautaki pae tawhiti mō te rohe whānui.

E kore e taea te karo - nā runga i ngā taumaha ohaoha me ngā taumahatanga ki te pūtea o te kaunihera, ka uaua ngā toru tau kei mua i te aroaro. Heoi, mēnā ka piri tata tātou, ka aro pū ki ngā mea e tino whakahirahira ana, kāore e kore ka eke panuku te rohe o Rodney.

A handwritten signature in blue ink, appearing to be 'Phelan Pirrie', with a small blue dot to the right.

Phelan Pirrie

Heamana, Te Poari ā-Rohe o Rodney

He whakarāpopotohanga o ngā kaupapa matua o te mahere

Whakaotinga tahi: Kei te tūhono ngā kōwhiringa ikiiki haumarū, pai ake i ō tātou hapori

Ka ea ngā wawata o te hapori i ngā mahi hangahanga hāereere ka tahi, he ngāwari mō te katoa te whakamahi i ngā waka tūmatanui ka rua. Ka ngāwari mā te tangata te takahi i te ara tata ki te kāinga mā te ara hīkoi, ara eke paihikara, ara hōiho hoki. E marutau ana ngā rori, e tiakina ana ngā rori.

Whakaotinga rua: Kei te hauora tō tātou taiao, ā, kei te tiakina

He taonga ngā ākau, ngā ara wai māori me te taiao. E ora ana, e mā ana, e taurikura ana te pūnaha rerenga hauropi. Ka manaakitia te taiao e te hapori - ka whakakorengia ngā riha, ka whakarauorahia te taiao, ka mimiti te para. Ka whakaheke i te puha hauhā, ka ngana ki te whakangāwari i ngā taumahatanga ki te taiao i ngā mahi o ia rā ki te aukati i ngā raru āhuarangi.

Whakaotinga toru: Ka ea ngā hiahia a ō tātou hapori tipu haere i ngā hanganga me te whanaketanga

E hīkaka ana ngā tāone me ngā pā - nā tērā ka hoko, ka mahi hoki ngā tāngata i tō tātou rohe. E whakahīhi ana ngā tāngata i tō rātou rohe pōtae me tōna tuakiri motuhake. E āta whakaarohia ana ngā mahi whakawhanake hōu kia whai wāhi atu ngā hapori o nāianeī, o āpōpō hoki, ki ngā whiringa.

Whakaotinga whā: He aumangea ō tātou hapori, ā, ka taea te pā atu ki tō rātou e hiahia ana

He hapori aumangea, he hapori kaha ki te manaaki i tēnā, i tēnā, ā, e rite ana mō ngā raru ohotata. Ka arahina e ngā hapori ngā kaupapa me ngā hui. Ka ea ngā wawata o ngā hapori e huri haere ana, e rahi haere ana, i ngā whare me ngā kaupapa hapori.

Whakaotinga rima: Ka ea ngā hiahia o tō tātou hapori tipu haere i ō tātou pāka hapori me ngā ratonga ā-rēhia






Ka whakamahia ngā pāka, ngā whare hākinakina, ngā whare ngahau e ngā tāngata maha - ahakoa te pūkenga, ahakoa te kaupapa. He wāhi whakatau i te mauri, he wāhi pai hei whakapakari tinana. He ngāwari te tae atu ki ngā wāhi rā, ā, he mea whakaea i ngā wawata o nāianeī, o āpōpō hoki.





Whakarāpopotohanga o ngā take pūtea

Ngā whiwhinga pūtea, whakapaunga pūtea, whakapaunga pūtea haumi o te Poari ā-Rohe o Rodney mai i te 1 Hōngongoi 2020 ki te 30 Pipiri 2021.

Rārangi Tahua Pūtea ā-Tau	2020/21 (\$000)
Whiwhinga moni i ngā mahi whakahaere	
Ratonga hapori ā-rohe	711
Whakarautaki ā-rohe me ngā mahi whakawhanake	-
Ratonga taiao ā-rohe	-
Mahi kāwana ā-rohe	-
Tataunga whiwhinga moni i ngā mahi whakahaere	711
Whakapaunga moni ki ngā mahi whakahaere	
Ratonga hapori ā-rohe	16,863
Whakarautaki ā-rohe me ngā mahi whakawhanake	315
Ratonga taiao ā-rohe	749
Mahi kāwana ā-rohe	1,115
Tataunga whakapaunga moni ki ngā mahi whakahaere	19,042
More whakapaunga moni ki ngā mahi whakahaere	18,331
Whakapaunga pūtea tōpū	
Ratonga hapori ā-rohe	4,346
Whakarautaki ā-rohe me ngā mahi whakawhanake	-
Ratonga taiao ā-rohe	-
Mahi kāwana ā-rohe	-
Tataunga whakapaunga pūtea tōpū	4,346

Ngā Mema o te Poari ā-Rohe o Rodney

	Ngā taipitopito hei toro atu ki ngā mema
	<p>Phelan Pirrie – Heamana Waea: 021 837 167 phelan.pirrie@aucklandcouncil.govt.nz</p>
	<p>Beth Houlbrooke – Heamana Tuarua Waea: 021 839 413 beth.houlbrooke@aucklandcouncil.govt.nz</p>
	<p>Brent Bailey Waea: 021 730 892 brent.bailey@aucklandcouncil.govt.nz</p>
	<p>Steven Garner Waea: 021 198 1582 steven.garner@aucklandcouncil.govt.nz</p>
	<p>Danielle Hancock Waea: 021 195 9826 danielle.hancock@aucklandcouncil.govt.nz</p>

	Ngā taipitopito hei toro atu ki ngā mema
	<p>Tim Holdgate Waea: 021 195 6366 tim.holdgate@aucklandcouncil.govt.nz</p>
	<p>Louise Johnston Waea: 021 729 739 louise.johnston@aucklandcouncil.govt.nz</p>
	<p>Vicki Kenny Waea: 027 670 9968 vicki.kenny@aucklandcouncil.govt.nz</p>
	<p>Colin Smith Waea: 021 731 051 colin.smith@aucklandcouncil.govt.nz</p>

